

## BHANJEKHU

Nanka amaphuzu amane asemqoka uma kuboniswana ngezindlela okungabukezwa ngazo umbhalo:

- 1 inkulumo indala kunombhalo
- 2 ingxoxo nenkondlo kakufani
- 3 izimpawu zephimbo ziyasiza
- 4 injobo ithungelwa ebandla

„Bhala njengoba ukhuluma“ (= „Bhanjekhu“)

Siyayithintitha incwadi kuqathake konke okuyizinhlamvana okuhlale kuhlale kudide uma umuntu efunda. Sihlakulela ukuthi amehlo edlule lula emagameni encwadi, emukelisane kalula nolimi, kunciphe ukungingiza, ufundwe kanye umusho uqondakale.

Siholwa yile mibono:

- 1 inkulumo indala kunombhalo:  
Lapho umbhalo uthathela kude khona, silandela inkulumo.  
Isibonelo: umbhalo uthi “uSimakade”; “ibhayibheli”  
inkulumo ithi: “*uSmakade*”; “*ibhayibheli*”
- 2 ingxoxo nenkondlo kakufani:  
Izinhlamvu zibhalwa ziphelele noma enkulumweni zingathinteki zonke.  
Inkondlo iyanqamulela; ifuzé inkulumo.  
Isibonelo: ingxoxo ithi “Musa ukungikhohlisa!”  
Inkondlo ithi “*Msukung’kohlisa!*” noma “*Msung’kohlisa!*”
- 3 izimpawu zephimbo ziyasiza:  
Siphokophele ukuthi zigcine zingasadingeki izimpawu zephimbo.  
Okwamanje  
sibona kudingekile ukusetshenziswa kophawu lwephembo esenzweni esisenka-  
thini esanda kwedlula.  
Isibonelo: “Ngedlulé bedlala umlabalaba.”  
“Ngifiké selingene isonto.”
- 4 injobo ithungelwa ebandla:  
Kukho konke okunye *sizoghubeka sihambisane nemithetho yokubhalwa kwesiZulu eyaphakanyiswa yanqunywa yisigunqu solimi lwesiZulu ngo-1989*. Imibono emisha esiba nayo (ikakhulukazi mayelana nokubhalwa kwamagama okwethekelwa: „uNovemba”; „irisidi”; „ama-ekzem”) siyoyethula njalo emkhandlwini, sicele izeluleko.

nguBheni wakwaKhumalo  
16.09.1996